



Broj: 01-50-1-15-28/08

Sarajevo, 29. aprila 2008. godine

ZAPISNIK

28. sjednice Predstavničkog doma
Parlamentarne skupštine Bosne i Hercegovine,
održane 29. aprila 2008. godine

Sjednica je počela u 10,05 sati. Prisustvovalo je 39 poslanika. Odsustvo su opravdali Sead Jamakosmanović, Mehmed Suljkanović i Mirjana Malić.

Iz Vijeća ministara BiH sjednici su prisustvovali: ministar Sredoje Nović i zamjenici ministara Senad Šepić, Srđan Arnaut, Marina Pendeš i Mijo Krešić.

Iz međunarodnih organizacija prisustvovali su predstavnici OHR-a, EUPM-a, britanske ambasade, te nevladine organizacije Centri civilnih inicijativa.

Sjednici su, zbog razmatranja njihovih izvještaja, prisustvovali predstavnici: Centralne banke BiH, Ureda za reviziju institucija BiH, Agencije za poštanski saobraćaj i Izvozno-kreditne agencije BiH.

Predsjedavajući Doma Milorad Živković u kratkim uvodnim napomenama obrazložio je dopunu i izmjenu predloženog dnevnog reda.

Rifat Doilić je, u raspravi o prijedlogu dnevnog reda, ukazao na nezadovoljstvo u javnosti povodom Prijedloga zakona o plaćama i naknadama u institucijama Bosne i Hercegovine i Prijedloga zakona o dužnostima i pravima članova Parlamentarne skupštine BiH. Zatražio je da predlagači Prijedloga zakona o dužnostima i pravima članova Parlamentarne skupštine BiH svoj prijedlog povuku.

Predsjedavajući Živković odgovorio je da je Prijedlog pomenutog zakona u dnevni red uvršten u skladu s Poslovníkom i ne može se skinuti, pa se zato zahtjev Dolića ne može staviti na glasanje.

Zatim je predsjedavajući konstatirao da 28. sjednica ima sljedeći

DNEVNI RED

1. Usvajanje zapisnika 26. i 27. sjednice Doma;
2. Poslanička pitanja i odgovori;
3. Zahtjev poslanika Jerka Ivankovića Lijanovića za razmatranje Prijedloga zakona o zaštiti domaće proizvodnje u okviru Sporazuma CEFTA, po hitnom postupku, u skladu s članom 127. Poslovníka;
4. Prijedlog zakona o poljoprivredi, ishrani i ruralnom razvoju BiH (drugo čitanje);
5. Prijedlog okvirnog zakona o zaštiti i spašavanju ljudi i materijalnih dobara od prirodnih i drugih nesreća u BiH (drugo čitanje);
6. Prijedlog zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu, sa Izvještajem Zajedničke komisije za odbranu i sigurnost,
7. Prijedlog zakona o dužnostima i pravima članova Parlamentarne skupštine BiH (prvo čitanje);
8. Prijedlog zakona o izmjenama i dopunama Zakona o polaganju pravosudnog ispita u BiH (prvo čitanje);
9. Prijedlog zakona o Agenciji za identifikacione dokumente, evidenciju i razmjenu podataka BiH (prvo čitanje);
10. Prijedlog zakona o izmjenama i dopunama Zakona o policijskim službenicima BiH (prvo čitanje);
11. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost,

12. Razmatranje:
 - Godišnjeg izvještaja Centralne banke BiH za 2007. godinu,
 - Finansijskog izvještaja Centralne banke BiH za 2007. godinu;
12. Razmatranje informativnog dokumenta Vijeća Evrope - Bosna i Hercegovina: Izvršavanje obaveza i provođenje postprijemnog programa saradnje;
13. Izvještaj o aktivnostima Ureda za reviziju institucija BiH u 2007. godini;
14. Izvještaj o radu Upravnog odbora Izvozno-kreditne agencije BiH;
15. Izvještaj o radu i finansijski izvještaj Agencije za poštanski saobraćaj BiH za 2007. godinu;
16. Izvještaj o zaštiti ličnih podataka u BiH i o radu Komisije za zaštitu podataka za 2007. godinu;
17. Inicijativa poslanika Denisa Bećirovića u vezi s pripremom Zakona o zabrani svih neofašističkih organizacija i upotrebe njihovih simbola, uključujući zabranu ustaških i četničkih organizacija, kao i onih koje se naslanjaju na tradiciju Handžar-divizije;
18. Imenovanje tri člana u Zajedničku komisiju za usaglašavanje Zakona o izmjenama i dopunama Zakona o upotrebi i zaštiti imena Bosne i Hercegovine;
19. Davanje saglasnosti za ratifikaciju:
 - a) Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini,
 - b) Sporazuma o saradnji u oblasti odbrane između Vijeća ministara BiH i Vlade Republike Grčke,
 - c) Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG - Projekat rekonstrukcije i proširenja vodovodnog sistema u općini Posušje,
 - d) Ugovora o zajmu – Reorganizacija projekta obnove elektroenergetskog sistema – između Bosne i Hercegovine i Evropske banke za obnovu i razvoj,
 - e) Ugovora o amandmanu – kojim se vrše izmjene i dopune Ugovora o zajmu od 2. novembra 2000. godine amandmanima od 5. decembra 2001. i 23. februara 2004. godine – između Bosne i Hercegovine i Evropske banke za obnovu i razvoj,
 - f) Konvencije o pristupu informacijama, učešću javnosti u odlučivanju i pristupu pravdi u pitanjima zaštite životne sredine,
 - g) Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja.

Ad. 1. Usvajanje zapisnika 26. i 27. sjednice Doma

O zapisnicima nije bilo rasprave.

Usvojeni su bez primjedbi – jednoglasno – sa 37 glasova "za" (Federacija BiH 23, RS 14).

Ad. 2. Poslanička pitanja i odgovori

Predsjedavajući Živković konstatirao je da su do ove sjednice odgovore na pitanja dobili poslanici:

- Husein Nanić – od Federalnog ministarstva finansija na pitanje postavljeno na 7. sjednici;
- Jovan Todorović - od Vijeća ministara BiH na pitanje postavljeno na 9. sjednici;
- Slavko Jovičić – od Vijeća ministara BiH dobio je odgovor na pitanje koje je stalno ponavljao, a tiče se nacionalne strukture zaposlenih u institucijama BiH;
- Rifat Dolić i Remzija Kadrić - od Vijeća ministara BiH dobili su odgovore na pitanja postavljena na 18. sjednici;
- Adem Huskić i Selim Bešlagić – od Vijeća ministara BiH na pitanja postavljena na 20. sjednici;
- Rifat Dolić – od Vijeća ministara BiH na četiri pitanja postavljena na 21. sjednici;
- Sadik Bahtiać, Denis Bećirović, Šemsudin Mehmedović i Jozo Križanović – od Vijeća ministara BiH dobili odgovore na pitanja postavljena na 21. sjednici;

- Mirko Okolić je od JP Direkcija cesta Federacije BiH dobio odgovor na pitanje postavljeno na 21. sjednici;
- Sadik Bahtić - od Vijeća ministara BiH dobio je odgovor na pitanje postavljeno na 23. sjednici;
- Zlatko Lagumdžija i Drago Kalabić su od Tužilaštva BiH dobili odgovore na pitanja postavljena na 23. sjednici i
- Vinko Zorić je od Ministarstva vanjskih poslova BiH dobio odgovor na pitanje postavljeno na 26. sjednici.

Odgovore na pitanja komentirali su: Remzija Kadrić, Jozo Križanović, Sefer Halilović, Adem Huskić, Jerko Ivanković Lijanović, Martin Raguž (u ime Vinka Zorića zbog njegovog odsustva za vrijeme ove tačke) i Zlatko Lagumdžija.

Postavljena su nova poslanička pitanja kako slijedi:

Šefik Džaferović:

“Ja imam dva kratka pitanja, oba su upućena Vijeću ministara BiH :

Prvo pitanje glasi :Kakvo je trenutno stanje zaštite stanovništva i životinja od bruceloze u BiH i šta na tom planu preduzima Vijeće ministara BiH? Tražim da se sastavi jedna informacija i tražim parlamentarnu raspravu o ovoj temi...Molim prvo odgovor a neka se slobodno pripremaju oni u Vijeću ministara BiH koji su za ovo zaduženi, ja ću tražiti, evo sad tražim parlamentarnu raspravu o ovoj temi.

Drugo pitanje, kako nas stvari ne bi zatekle. Mi smo se jako potrudili i Vijeće ministara BiH i mi u Parlamentu da prošle godine usvojimo Zakon o visokom obrazovanju....Tražim informaciju i parlamentarnu raspravu o tome - kako stoje stvari s provođenjem Zakona o visokom obrazovanju i kako su nam univerziteti i sveučilišta u BiH pripremljeni za predstojeći proces akreditacije i uključivanja u Bolonju? «

Husein Nanić:

“Ja imam danas evo dva poslanička pitanja. Jedno je pitanje za Ministarstvo sigurnosti i SIPA-u, a ono je sljedeće:

Po kojem propisu i po kojim kriterijima se dodjeljuju prava na rotacije plavo-crvene nekakve naprijed što jako onako ubijaju izgledom na bh. cestama, te da li je ikome i po kojim propisima dozvoljeno da krši saobraćajne propise na bh. cestama? Tražim spisak svih vozila i zvaničnika kojima su dodijeljene dozvole za posjedovanje i upotrebu rotacionih svjetala u BiH. Mislim da je ovdje dovoljno jasno o kojim vozilima se radi.

Drugo pitanje postavljam, preko Vijeća ministara BiH, premijeru Vlade Federacije BiH. S obzirom da je Predstavnički dom Parlamenta Federacije BiH u nekoliko nastavaka svojih sjednica, cijeneći izuzetno teško stanje kao i potencijale Agrokomerca d.d. iz Velike Kladuše, donio i nekoliko zaključaka, pitam:

Da li je ispoštovan Zaključak u Parlamentu Federacije BiH o dodjeli sredstava za uplatu doprinosa radnicima Agrokomerca koji su ostvarili pravo ali zbog neuplaćenih doprinosa ne primaju penziju? Ako jeste i ako su uplaćena, kada i na čiji račun, a ako nisu, da li će biti uplaćena i kada?”

Milica Marković:

“Imam pitanje koje je upućeno Regulatornoj agenciji za komunikacije iz sljedećih razloga;

Da li je za Regulatornu agenciju za komunikacije dozvoljeno i dopustivo da RTV Federacije BiH u pojedinim emisijama i programima kvalificira i etiketira pojedine javne ličnosti i stranke u BiH a naročito one iz RS-a, ne poštujući ni elementarne kriterije respektiranja kulture u javnoj komunikaciji, naročito u kontekstu kada te kvalifikacije imaju smisao podrijetva identiteta i privatnosti svake javne političke ličnosti, i da li se u izdavanju licence za rad javnom emiteru vodi računa o poštovanju kodeksa ponašanja novinara RTV u BiH?”

Rifat Dolić:

“Imam dva pitanja. Prvo pitanje je resornom ministru za ljudska prava i izbjeglice u Vijeću ministara BiH.

Šta možete preduzeti da se zaustavi hajka na nezaposlene građane Federacije BiH koju, pod geslom akcije borbe protiv rada na crno i zloupotrebe statusa nezaposlenosti, u posljednjih 15-ak dana provodi u Federaciji BiH Federalna inspekcija rada a kojom se s evidencije nezaposlenosti u zavodima za zapošljavanje jednostrano, bez ikakvog rješenja i bez prava na žalbu, brišu nezaposleni građani Federacije BiH među kojima i veliki broj onih koji su iznajmili nekoliko kvadratnih metara tezgi na pijacama...? Da li se ovim građanima krše ljudska prava samom činjenicom da nisu dobili nikakva pismena rješenja o brisanju s evidencije nezaposlenih i da nemaju pravo na žalbu? Da li se na ovakav način nezaposlenim građanima, u stvari, sugerira da, dok čekaju posao, umjesto pronalaska načina za prehranjivanje porodice, radije prose, džepare ili otimaju i kome se ovi građani mogu obratiti radi zaštite svojih prava koja su ovakvim postupcima kršena?

Drugo pitanje upućeno je resornom ministru i ministarstvu u Vijeću ministara BiH:

Kako se zvanično kreće stanje nataliteta stanovništva u BiH u poslijeratnom periodu po entitetima i kantonima i da li su zakonski utvrđene bilo kakve mjere stimulacije nataliteta i pomoći porodicama s više djece u kantonima i entitetima i ako jesu, kako se to radi?”

Lazar Prodanović:

« Moje pitanje upućeno je Vijeću ministara BiH.

Molim vas da mi dostavite iznose plaća svih izabranih i imenovanih zvaničnika u svim institucijama BiH koje su bile predmet obrade, dakle izvještaja Ureda za reviziju institucija BiH, svih 53 koliko ih ima, kako bi javnost, koja je često jednostrano informirana o primanjima i koja je uglavnom fokusirana na izabrane zvaničnike u najnegativnijem smislu, mogla da ima adekvatne informacije i da ih u tom smislu koristi radi obavještavanja javnosti.»

Sadik Bahtić:

“Imam za danas dva pitanja. Prvo pitanje za Ministarstvo prometa i komunikacija BiH:

Tražim od resornog ministarstva da mi odgovori šta je do sada uradilo i šta planira uraditi za cestovno i željezničko povezivanje Krajine sa ostalim dijelovima BiH, centrom Sarajeva, susjednim državama i EU? Kada će Ministarstvo pustiti u promet željezničku prugu kroz Krajinu od Bihaća do Hrvatske, Sarajeva, kako bi se i Krajina željezničkim prometom povezala sa Sarajevom, susjednim državama i EU?

Drugo pitanje za RAK: Šta ste do sada preduzeli i šta ćete preduzeti da se u pojedinim javnim emiterima prekine medijska hajka i linč, u kojima se iznose gnusne neistine, laži, čak i montaže iz najgoreg komunističkog doba, u diskretaciji određenih političara, kako bi se ušutkali ili uklonili s političke scene?”

Beriz Belkić:

“Pitanje je za Vijeće ministara BiH i glasi: Zašto je Vijeće ministara BiH, članom 18. Odluke o postupku izdavanja i načina postupanja s obveznicama BiH koje se izdaju radi izmirenja obaveza po osnovu stare devizne štednje, odlučilo da se ona ne odnosi na RS? »

Jovan Todorović:

“Moje pitanje upućeno je Vijeću ministara BiH i tražim pisani odgovor: Kada će se u Vanjskotrgovinskoj komori BiH usvojiti Izvještaj o poslovanju za 2007.godinu i Finansijski plan za 2008.godinu? Kad će se imenovati novi generalni sekretar jer je postojećem mandat istekao prije šest mjeseci? Po čijem ovlaštenju imenovani obavlja dužnost generalnog sekretara?»

Milorad Živković:

“Imam dva kratka pitanja. Jedno je upućeno Ministarstvu za promet i komunikacije BiH: Molim vas da mi dostavite informaciju o aktivnostima u vezi sa smještajem Direkcije za civilno zrakoplovstvo BiH u Banjoj Luci, s obzirom da o tome imamo više oprečnih mišljenja i aktivnosti koje se vode mimo onoga što je dogovoreno. Želio bih tu informaciju dobiti što hitnije.

Drugo pitanje upućeno je Vijeću ministara BiH: Molim vas da sačinite informaciju o efektima zakonskih rešenja kojima je prenesena nadležnost s entiteta na nivo zajedničkih organa BiH, da ne bi ovdje pojedinačno razmatrali svaki zakon i njegove efekte. Tražim, dakle, da se napravi zbirna informacija o nekih 50-ak, kako kažu, prenesenih nadležnosti, da vidimo te efekte.”

Velimir Jukić:

“Postavljam jedno vrlo kratko pitanje. Upućujem ga Vijeću ministara BiH a ono glasi: Kolike su plaće i druge naknade menadžmenta i rukovodstva sva tri javna RTV servisa u BiH i Upravnog odnosno Nadzornog odbora ovih servisa?”

Ad . 3. Zahtjev poslanika Jerka Ivankovića Lijanovića za razmatranje Prijedloga zakona o zaštiti domaće proizvodnje u okviru Sporazuma CEFTA, po hitnom postupku, u skladu s članom 127. Poslovnika

Jerko Ivanković Lijanović podnio je Domu obrazloženje Prijedloga zakona i zahtjeva za hitni postupak. Prilikom glasnja Lijanović je povukao zahtjev za hitni postupak i zatražio da se glasa o proceduri po skraćenom postupku, u skladu s članom 126. Poslovnika.

Sa 19 glasova "za" (Federacija BiH 14, RS 5), 14 "protiv" i tri "suzdržana", za Prijedlog zakona iz ove tačke usvojena je procedura po članu 126. Poslovnika Doma.

Ad. 4. Prijedlog zakona o poljoprivredi, ishrani i ruralnom razvoju BiH (drugo čitanje)

Predsjedavajući Živković podsjetio je na proceduru koja je vođena o Prijedlogu ovog zakona, kao i na Izvještaj nadležne komisije i amandmane sadržane u Izvještaju. Podsjetio je da u plenarnoj fazi nema amandmana.

Nije bilo rasprave

Sa 33 glasa "za" (Federacija BiH 23, RS 10), tri "protiv" i jednim "suzdržanim", usvojen je Zakon o poljoprivredi, ishrani i ruralnom razvoju Bosne i Hercegovine.

Ad . 5. Prijedlog okvirnog zakona o zaštiti i spašavanju ljudi i materijalnih dobara od prirodnih i drugih nesreća u BiH (drugo čitanje)

Predsjedavajući je također u uvodnim napomenama podsjetio na Izvještaj nadležne komisije navodeći da u plenarnoj fazi nema amandmana.

Nije bilo rasprave.

Zakon iz ove tačke usvojen je sa 35 glasova "za" (Federacija BiH 23, RS 12), a jedan poslanik je bio "suzdržan".

Ad. 6. Prijedlog zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu, sa Izvještajem Zajedničke komisije za odbranu i sigurnost

U uvodnim napomenama predsjedavajući je podsjetio na proceduru koja je provedena o ovom prijedlogu zakona, te da je Izvještaj nadležne komisije po drugi put negativan i da se glasa o Izvještaju, te da se, i u slučaju da se Izvještaj ne usvoji, obustavlja procedura.

U raspravi su učestvovali Beriz Belkić i Momčilo Novaković.

Prilikom glasanja Izvještaj nije usvojen – "za" je glasalo 18, "protiv" 19 poslanika.

Predsjedavajući je konstatirao da Izvještaj Zajedničke komisije nije usvojen, ali da se, u skladu s Poslovníkom, obustavlja procedura o Prijedlogu zakona iz ove tačke, s obzirom da je Izvještaj nadležne komisije dva puta bio negativan.

Ad . 7. Prijedlog zakona o dužnostima i pravima članova Parlamentarne skupštine BiH (prvo čitanje)

U uvodnim napomenama predsjedavajući je podsjetio koji su poslanici predložili zakon.

Azra Hadžiahmetović prigovorila je da je među predlagačima pročitano njeno ime, a da ona nije potpisnik među predlagačima Zakona.

Predsjedavajući je odgovorio da nije pročitao njeno ime, već ime Azre Alajbegović.

Branko Dokić i Niko Lozančić su također intervenirali, rekavši da nisu potpisnici Prijedloga zakona iz ove tačke a da su njihova imena pročitana, što je provjerom potpisa i potvrđeno.

U raspravi o ovoj tački učestvovali su: Rifat Dolić, Beriz Belkić, Jozo Križanović, Niko Lozančić i Bakir Izetbegović.

Prilikom glasanja Remzija Kadrić je, u ime svih predlagača, povukao Prijedlog zakona i predložio zaključak koji glasi:

Zadužuju se Vijeće ministara BiH i nadležne komisije Predstavničkog doma Parlamentarne skupštine BiH da, vodeći računa o svim okolnostima, kao i praksi država u okruženju, pristupe predlaganju usvajanja posebnog zakona radi rješavanja pitanja dužnosti i prava članova Parlamentarne skupštine BiH, kao i drugih izabranih zvaničnika na nivou Bosne i Hercegovine.

Ovaj zaključak usvojen je sa 22 glasa "za" (Federacija BiH 10, RS 12), 11 "protiv" i tri "suzdržana".

Ad . 8. Prijedlog zakona o izmjenama i dopunama Zakona o polaganju pravosudnog ispita u BiH (prvo čitanje)

U okviru ove tačke kratko je diskutirao Beriz Belkić.

Prijedlog zakona je u prvom čitanju usvojen sa 34 glasa "za" (Federacija BiH 20, RS 14) i dva "suzdržana".

Ad. 9. Prijedlog zakona o Agenciji za identifikacione dokumente, evidenciju i razmjenu podataka BiH (prvo čitanje)

Ministar Nović podnio je Domu obarazloženje Prijedloga ovog zakona.

U raspravi su učestvovali Momčilo Novaković i Branko Dokić, a nakon toga govorio je ministar Sredoje Nović.

Prilikom glasanja usvojen je Prijedlog ovog zakona u prvom čitanju. "Za" su glasala 34 (Federacija BiH 21, RS 13), "suzdržala" se dva poslanika.

Ad .10. Prijedlog zakona o izmjenama i dopunama Zakona o policijskim službenicima BiH (prvo čitanje)

Nije bilo rasprave.

Sa 32 glasa "za" (Federacija BiH 19, RS 13) i pet "suzdržanih", usvojen je Prijedlog zakona u prvom čitanju.

Ad. 11. Prijedlog zakona o kontroli kretanja oružja i vojne opreme, s Mišljenjem Zajedničke komisije za odbranu i sigurnost

Poslije uvodnih napomena predsjedavajućeg, u raspravi su učestvovali: Beriz Belkić, Bakir Izetbegović, Adem Huskić, Šefik Džaferović i Drago Kalabić.

Većina diskutantata založila se za potrebu donošenja ovog zakona. Šefik Džaferović predložio je i zaključak, kojim je zatražio da se ne usvoji Mišljenje nadležne komisije i da se Komisija zaduži da zajedno s Vijećem ministara BiH i entitetskim vladama još jednom razmotri Prijedlog zakona i Domu dostavi novi izvještaj.

Prilikom glasanja predsjedavajući je prvo na glasanje dao Mišljenje Komisije, koje nije usvojeno. "Za" je glasalo 15, "protiv" 21 poslanik.

Zatim se Dom izjasnio o zaključku Šefika Džaferovića - drugi stav, koji glasi:

Zadužuje se Komisija da, u saradnji s Vijećem ministara BiH i entitetskim vladama, još jednom razmotri Prijedlog ovog zakona i Domu dostavi novi izvještaj.

Ovaj zaključak usvojen je sa 26 glasova "za" (Federacija BiH 17, RS devet) i 10 "suzdržanih".

Ad . 12. Razmatranje:

- Godišnjeg izvještaja Centralne banke BiH za 2007. godinu,
- Finansijskog izvještaja Centralne banke BiH za 2007. godinu

Predsjedavajući Doma dao je kratke uvodne napomene.

Guverner Centralne banke BiH Kemal Kozarić podnio je Domu izlaganje povodom ovih izvještaja.

U raspravi su učestvovali: Sadik Bahtić, Velimir Jukić, Beriz Belkić, Mirko Okolić, Bakir Izetbegović, Azra Hadžiahmetović, Savo Erić, Jerko Ivanković Lijanović, Šefik Džaferović i Slavko Jovičić. Povodom rasprave, ponovo je govorio guverner Kemal Kozarić.

Prilikom glasanja, sa 36 glasova "za" (Federacija BiH 22, RS 14) i jednim "suzdržanim", usvojeni su Godišnji izvještaj i finansijski izvještaji Centralne banke BiH za 2007. godinu.

Na prijedlog poslanika Velimira Jukića, Save Erića i Adema Huskića, povodom izvještaja, usvojeni su sljedeći

Z A K L J U Č C I

1. Zadužuje se Vijeće ministara BiH da, nakon usaglašavanja s entitetskim i kantonalnim vlastima, te vlastima Brčko Distrikta BiH, izradi strategiju i definiira poslovnu politiku i mjere s konkretnim rješenjima kojima će se: omogućiti monetarna stabilnost, stabilno i za investicije povoljno okruženje, ublažiti negativne (prijeteće) moguće visoke stope inflacije (veće od 5%), omogućiti povećanje domaćih i stranih investicija, povećati domaća proizvodnja, a naročito ona izvoznoorijentirana.
2. Zadužuju se nadležne komisije Parlamentarne skupštine BiH da, zajedno s Vijećem ministara BiH i nadležnim ministarstvima, u vezi s pitanjem deficita i inflacije, izrade predlog mjera, planova, programa i zakonskih rješenja za suzbijanje deficita i inflacije, kao i prijedlog puta do suficita, kako bi sljedeći izvještaji Centralne banke bili pozitivni i kako bi se na terenu osjetio boljitak kod svih građana.
3. Obavezuje se Vijeće ministara BiH da, u roku od 90 dana, izradi analizu poslovnog okruženja u BiH, te kroz najšire konsultacije pripremi cjelovit program mjera i aktivnosti koje će omogućiti da BiH bude poželjno mjesto za investiranje, i za strane i za domaće investitore.
 - Zaključak pod tačl.1. (predlagač: Velimir Jukić) usvojen je sa 31 glasom "za" (Federacija BiH 19, RS 12), šest poslanika bilo je "suzdržano";
 - Zaključak pod tač. 2. (predlagač: Savo Erić) usvojen je sa 17 glasova "za" (Federacija BiH 10, RS sedam), jednim "protiv" i 16 "suzdržanih" i
 - Zaključak pod tač. 3. (predlagač: Adem Huskić) usvojen sa 26 glasova "za" (Federacija BiH 18, RS osam) i osam "suzdržanih".

Ad . 13. Razmatranje informativnog dokumenta Vijeća Evrope - Bosna i Hercegovina: Izvršavanje obaveza i provođenje postprijemnog programa saradnje

Poslije kraćih uvodnih napomena predsjedavajućeg, u raspravi su učestvovali: Denis Bećirović, Husein Nanić, Milica Marković, Bakir Izetbegović, Milorad Živković, Martin Raguž, Selim Bešliagić i Slavko Jovičić.

Prilikom glasanja predsjedavajući je konstatirao da je Dom primio k znanju informativni dokument iz ove tačke i na glasanje dao prijedloge zaključaka koje su predložili: Bakir Izetbegović, Denis Bećirović i Selim Bešliagić. Usvojeni su zaključci koje su predložili Izetbegović i Bećirović, koji glase:

1. Zadužuje se Vijeće ministara BiH da Parlamentarnoj skupštini BiH hitno dostavi na ratifikaciju sljedeće dokumente koje je BiH potpisala u okviru ispunjavanja postprijemnih obaveza prema Vijeću Evrope:
 - Evropsku socijalnu povelju (revidiranu),
 - Evropsku povelju o regionalnim i manjinskim jezicima,
 - Evropsku konvenciju o državljanstvu,
 - VI. protokol Općeg sporazuma o privilegijama i imunitetima,
 - Evropsku konvenciju o prekograničnoj saradnji između teritorijalnih zajednica i organa.
2. Traži se od Vijeća ministara BiH da hitno završi izradu Studije o kompatibilnosti bh. zakonodavstva s Evropskom konvencijom o ljudskim pravima.
3. Zadužuje se Vijeće ministara BiH da, najkasnije u roku od 30 dana, izradi cjelovit program mjera s ciljem provođenja nerealiziranih obaveza i preporuka sadržanih u informativnom dokumentu Vijeća Evrope o izvršavanju i provođenju postprijemnog programa saradnje.
4. Predstavnički dom Parlamentarne skupštine BiH će, najkasnije u roku od 60 dana, razmatrati i usvojiti pomenuti program Vijeća ministara BiH.
 - Zaključci pod 1.i 2. tačkom (predlagač: B. Izetbegović) usvojeni su sa 34 glasa "za" (Federacija 21, RS 13) i dva "suzdržana";
 - Zaključci pod 3.i 4. tačkom (predlagač: D. Bećirović) usvojeni su sa 28 glasova "za" (Federacija BiH 22,RS šest), šest "protiv" i dva "suzdržana".

Selim Bešliagić predložio je sljedeći zaključak:

„Vijeće ministara BiH će, u roku od 60 dana, sagledati mogućnost i dati prijedlog o prevazilaženju pitanja da se optuženom za ratni zločin sudi u zemlji u kojoj je uhapšen, a ne u zemlji u kojoj je počinjen zločin, te da se predloži nastavak „Rimskog puta“ a u vezi s ratnim zločinima“.

Prijedlog ovog zaključka nije usvojen. "Za" su glasala 24 poslanika (Federacija BiH 21, RS tri), tri "protiv", a devet poslanika se "suzdržalo". Kako nije bilo entitetske većine, odmah je provedeno usaglašavanje u Kolegiju i nije bilo saglasnosti. U drugom krugu glasanja iz RS-a je "protiv" zaključka glasalo 11 poslanika, što je više od dvije trećine iz entiteta.

Ad. 14. Izvještaj o aktivnostima Ureda za reviziju institucija BiH u 2007. godini

Poslije uvodnih napomena predsjedavajućeg Doma, u okviru ove tačke diskutirali su: Sadik Bahtić, Jerko Ivanković Lijanović i Lazar Prodanović. Nakon ovih diskusija kratko je govorio zamjenik generalnog revizora Dragan Kulina.

Prilikom glasanja Dom je, sa 34 glasa "za" (Federacija BiH 20, RS 14) i dva "suzdržana", usvojio Izvještaj o aktivnostima Ureda za reviziju institucija BiH u 2007. godini.

Nije usvojen zaključak koji je predložio Jerko Ivanković Lijanović. "Za" je glasalo pet, "protiv" 19, "suzdržalo" se 11 poslanika. Sadržaj predloženog zaključka je sljedeći:

„Obavezuje se Ured za reviziju institucija BiH da u plan za 2008. godinu uvrsti i revizije učinaka, te da za pilot-projekat revizije učinka uradi reviziju učinka Sporazuma CEFTA u 2008. godini.“

Ad. 15. Izvještaj o radu Upravnog odbora Izvozno-kreditne agencije BiH

U uvodnim napomenama predsjedavajući je podsjetio na odredbe Zakona o osnivanju Agencije po kojima je obavezna jednom godišnje Parlamentarnoj skupštini BiH i Vijeću ministara BiH podnijeti izvještaj o radu Upravnog odbora Agencije. Također je podsjetio na Mišljenje nadležne komisije.

Kratko je diskutirao Šemsudin Mehmedović, koji je predložio usvajanje zaključka.

Sa 33 glasa "za" (Federacija BiH 20, RS 13) i tri "suzdržana", usvojen je Izvještaj iz ove tačke.

U toku glasanja, povodom zaključka Šemsudina Mehmedovića, govorila je Azra Hadžiahmetović.

Prijedlog zaključak Šemsudina Mehmedovića nije usvojen. "Za" je glasalo 14 (Federacija BiH 12, RS dva), "protiv" 12, "suzdržalo" se 11 poslanika. U drugom krugu glasanja iz RS-a "protiv" je glasalo 11 poslanika, što je više od dvije trećine iz entiteta. Sadržaj predloženog zaključka je sljedeći:

„Zadužuje se Vijeće ministara BiH da osigura adekvatnu podršku dokapitalizaciji Izvozno-kreditne agencije, kako bi, u ime i za račun države, mogla osigurati donacije i osiguranje za određene izvozne poslove.“

Ad . 16. Izvještaj o radu i finansijski izvještaj Agencije za poštanski saobraćaj BiH za 2007. godinu

Predsjedavajući Doma je u uvodnim napomenama podsjetio na Mišljenje nadležne komisije i predloženi zaključak.

U raspravi su učestvovali: Husein Nanić, Sadik Bahtić, Momčilo Novaković i Branko Dokić, a u ime Agencije govorio je Delivoje Đerić.

Poslije rasprave, Dom je, sa 26 glasova "za" (Federacija BiH 16, RS 10) i sedam "suzdržanih", usvojio Izvještaj iz ove tačke, sa zaključkom koji je predložila nadležna komisija, a koji glasi:

Traži se od Agencije za poštanski saobraćaj BiH da u što kraćem roku organizira svoj rad u skladu sa Zakonom o poštama BiH, s ciljem provođenja svojih nadležnosti propisanih Zakonom.

Ad .17. Izvještaj o zaštiti ličnih podataka u BiH i o radu Komisije za zaštitu podataka za 2007. godinu

Predsjedavajući je u uvodnim napomenama podsjetio da je na 24. sjednici Doma odgođeno izjašnjavanje o ovom izvještaju zbog odsustva predstavnika podnosioca Izvještaja i zadužena nadležna komisija da obnovi postupak o Izvještaju, kao i da je na prijedlog iz rasprave usvojen zaključak koji glasi:

1. Obavezuje se Komisija za zaštitu podataka da osmisli plan aktivnosti s ciljem upoznavanja građana o ovoj problematici.

2. Obavezuje se Vijeće ministara BiH da finansijski i organizaciono osigura realizaciju ovog zaključka.

Nadležna komisija dostavila je novo mišljenje i podržala Izvještaj.

Nije bilo rasprave. Sa 30 glasova "za" (Federacija BiH 18, RS 12) i dva "suzdržana", usvojen je Izvještaj o zaštiti ličnih podataka u BiH i o radu Komisije za zaštitu podataka za 2007. godinu.

Ad. 18. Inicijativa poslanika Denisa Bećirovića u vezi s pripremom Zakona o zabrani svih neofašističkih organizacija i upotrebe njihovih simbola, uključujući zabranu ustaških i četničkih organizacija, kao i onih koje se naslanjaju na tradiciju Handžar-divizije

Denis Bećirović podnio je obrazloženje Inicijative.

U raspravi i replikama učestvovali su: Šemsudin Mehmedović, Slavko Jovičić, Beriz Belkić, Jozo Križanović, Velimir Jukić, Branko Dokić, Momčilo Novaković, Drago Kalabić, Selim Bešlagić, Milorad Živković, Denis Bećirović, Lazar Prodanović, Martin Raguž, Sadik Ahmetović, Ekrem Ajanović, Bakir Izetbegović, Sadik Bahtić, Adem Huskić, Azra Alajbegović, Sefer Halilović, Remzija Kadrić, Niko Lozančić, Mirko Okolić i Milica Marković.

Prilikom glasanja, predsjedavajući je prvo na glasanje dao Inicijativu.

"Za" su glasala 24 (Federacija BiH 22, RS dva), "protiv" 11, "suzdržao" se jedan poslanik. Zbog nedostatka entitetske većine, izvršeno je usaglašavanje u Kolegiju. Nije bilo saglasnosti. U drugom krugu glasanja iz RS-a "protiv" je glasalo 11, što je više od dvije trećine. Prema tome, Inicijativa nije usvojena.

Predsjedavajući je zatim na glasanje dao zaključak koji je u raspravi predložilo više klubova, a koji glasi:

Zadužuje se Vijeće ministara BiH da pripremi zakon o zabrani svih neofašističkih organizacija i upotrebi njihovih simbola.

Ovaj zaključak usvojen je sa 31 glasom "za" (Federacija BiH 17, RS 14) i četiri "suzdržana" glasa.

Ad . 19. Imenovanje tri člana u Zajedničku komisiju za usaglašavanje Zakona o izmjenama i dopunama Zakona o upotrebi i zaštiti imena Bosne i Hercegovine

Nije bilo rasprave.

Na prijedlog Kolegija, u Zajedničku komisiju su imenovani: Milica Marković, Adem Huskić i Martin Raguž.

Ad. 20. Davanje saglasnosti za ratifikaciju:

- a) Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini,
- b) Sporazuma o saradnji u oblasti odbrane između Vijeća ministara BiH i Vlade Republike Grčke,
- c) Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG - Projekat rekonstrukcije i proširenja vodovodnog sistema u općini Posušje,
- d) Ugovora o zajmu – Reorganizacija projekta obnove elektroenergetskog sistema – između Bosne i Hercegovine i Evropske banke za obnovu i razvoj,
- e) Ugovora o amandmanu – kojim se vrše izmjene i dopune Ugovora o zajmu od 2. novembra 2000. godine amandmanima od 5. decembra 2001. i 23. februara 2004. godine – između Bosne i Hercegovine i Evropske banke za obnovu i razvoj,
- f) Konvencije o pristupu informacijama, učešću javnosti u odlučivanju i pristupu pravdi u pitanjima zaštite životne sredine,
- g) Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja.

Predsjedavajući je podsjetio da je Komisija za vanjske poslove dala pozitivno mišljenje o svim aktima iz ove tačke.

U raspravi su učestvovali: Sefer Halilović, Husein Nanić i Velimir Jukić.

Glasajući o svakom pojedinačno, Dom je dao saglasnost za ratifikaciju svih akata iz ove tačke.

Rezultati glasanja su sljedeći:

- "za" Sporazum pod a) jednoglasno – 30 glasova (Federacija BiH 20, RS 10);
- "za" Sporazum pod b) jednoglasno – za 30 (Federacija BiH 21, RS 12);
- "za" Sporazum pod c) za 29 (Federacija BiH 18, RS 11), "protiv" jedan, "suzdržana" dva;
- "za" Ugovor pod d) za 31 (Federacija BiH 19, RS 12), "protiv" jedan, "suzdržana" tri;
- "za" Ugovor pod e) – za 34 (Federacija BiH 12, RS 14), "suzdržana" tri;
- "za" Konvenciju pod f) jednoglasno – 35 glasova (Federacija BiH 22, RS 13) i
- "za" Protokol pod g) za 36 (Federacija BiH 23, RS 13), "suzdržan" jedan poslanik.

Sjednica je završena u 18,40 sati.

Sastavni dio Zapisnika je transkript 28. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković